

21 DEC 2002

Sabah-Majlis

PEMECATAN ANGGOTA MAJLIS YANG GANGGU USAHA KUTIPAN CUKAI

KOTA KINABALU, 21 Dis (Bernama) -- Anggota Majlis Kerajaan Tempatan di Sabah yang mengganggu usaha pungutan cukai diberi amaran boleh dipecat, kata Menteri Kerajaan Tempatan dan Perumahan Negeri Datuk Seri Salleh Tun Said.

Beliau berkata kementerian itu akan mengawasi semua anggota majlis, yang kebanyakan ialah ahli politik bagi memastikan mereka menjalankan tugas seperti yang diharapkan.

"Ahli politik yang menduduki majlis dan tidak bekerjasama dalam usaha pungutan cukai akan dipecat atau kontrak mereka tidak disambung," katanya apabila dihubungi di sini.

Salleh diminta mengulas kenyataan Perdana Menteri Datuk Seri Dr Mahathir Mohamad yang menyelar pihak berkuasa tempatan yang malas memungut cukai.

Oleh sebab banyak orang politik yang menduduki lembaga kerajaan tempatan, keberkesanan pungutan cukai membuatkan mereka tidak popular, kata Dr Mahathir yang juga Menteri Kewangan.

Mengenai prestasi pungutan cukai oleh pihak berkuasa tempatan Sabah, Salleh berkata ia semakin meningkat tetapi masih banyak yang perlu dilakukan untuk menambah pungutan hasil kerajaan.

Sama ada terdapat masalah apabila orang politik yang menduduki lembaga kerajaan tempatan, tidak bekerjasama dalam usaha pungutan cukai, Salleh berkata: Terdapat masalah di pihak berkuasa tertentu tetapi jumlahnya kecil...keadaan sedang berubah kini."

Salleh berkata beliau akan mengarahkan semua pihak berkuasa tempatan agar berusaha bersungguh-sungguh memungut cukai.

Malahan langkah telah diperkenalkan bagi memudahkan pungutan cukai seperti menyediakan lebih banyak kaunter pembayaran dan melantik ejen profesional untuk memungut cukai bagi pihak kerajaan tempatan.

"Kita telah memberitahu majlis tempatan agar berusaha sendiri dari segi kewangan. Ini kita jadikan keutamaan penting bagi tahun 2003," katanya.

-- BERNAMA

JS HM